

Filemón

Pablo ishim saludo Porrosht aabo.

¹Yok Pablo. Yok de karsel ehet pork ye tokotiis Jesucristope. Par yok ich shi itso uje Jesucristo shuu oshiyeru yok. Yok hn eyok leshibich Timoteo oyichew ana hutita oyosim owa, Filemón. Owa ebiyo shi itso òryok ibiyo. Ich oyahmūr pish owa. ²Oyichew ana hutita par nos wir Porrosht aabo toy uje otakisho lawichihichis ahuch, hn par asa eyok nanimicha Apia toy. Arquipo dechi toy. Wichi ibiyo shi itso òryok. ³Sehe tuu eyok Deych Porrosht hn eyok Irhich Jesucristo dosir olak hn oduhu olak aho kiis.

Pablo sahmūr uje Filemón shiyokōr.

⁴Filemón, uje yok orar hn peyucha owa ich shish tikina Porrosht par owa, ⁵pork tukunt uje nos ahmūr wir Porrosht aabo hn ahmūr eyok Irhich Jesús toy hn ye otiis irpe. ⁶Tapur Porrosht par owa uje animirāha ir ahwoso atim yewo par uje ye olotiis irpe par uje nos odiraha erze uje ich om uje tāra Cristo pork wichi uje takashim eyok. ⁷Pishibiche Filemón, uje tukunt uje ahmūr Porrosht hn ahmūr ir aabo toy ich shuu yok aylpa hn pehet kiis. Tukunt uje akashim Porrosht aabo yewo uhu ma òr aho kiis.

Pablo sehe duhu Filemón sosir Onésimo.

⁸Titim owa uje Cristo wichi uje ishim yok pibich uje ich dich, heke yok pwele titim owa par uje ahakōr kuche ⁹per ye tahmūr tirok owape. Shi titim owa pork tahmūr owa. Yok Pablo. Ich yok ilaro. Yok de karsel ehet shi pork ye tokotiis Jesucristope. ¹⁰Tapur owa par uje akashim Onésimo. Uje yok de lika karsel ehet ich tuu Onésimo masaha par Porrosht aap, heke wichi shi itso uje yok pijo. ¹¹Onésimo wichi owa elak. Antni ich ye jukur per ele ahle ich wichi bale. Bale par owa hn bale par yok toy. ¹²Tuu Onésimo hno tīr owapo. Tahmūr ire heke ich tukuuna uje tuu hno

cheeshpo tĩr owa. ¹³Par yok ich ma om kimiji Onésimo shi lakaha pahir pork sehe tuu wichi masaha owa owich par uje takashim yok uje yok de lika karsel eheth shi pork tanimirãha Porrosht ahwoso titim oso uje Jesucristo ishi òr hnitewihi Porrosht ahirkite ¹⁴per ye tahmũrpe uje tuu Onésimo sakaha pahir uje ehn yahpaa tikiraha ahwotik par uje ye tirok owa hn tuu akashim yok. Sehe tuu akashim yok kimiji ahmũr. ¹⁵Par yok ich shi itso uje Onésimo yuhwoho ahir par uje shuu daalo arhaabo hn cheeshpo par uje shish sakaha ahir nehe, ¹⁶per ye shi wichi chihi ahirpe ilo erze òr yilo. Onésimo ma bale je òr yilo. Wichi pishap uje tahmũr, hn owa eshap toy heke ahmũr ire toy ye shi pork wichi elak. Ahmũr ire pork wichi Porrosht aap. ¹⁷Kimiji ebite uje yok owa ahirakpa ich ahakõr oomihĩ Onésimo uhu wichi ilo yok. ¹⁸Kimiji niyokõr kucherkĩhi owa o kimiji ir hnitew chihi owa ich ebite yok hnitewta. ¹⁹Yok Pablo uje tichew ana hutita. Tibite uje tyenij tokoshi ir hnitewta. Titim owani par uje amsaha par Porrosht aap heke ich shi itso uje owa hnitewta de pahir per ye tirok owape. ²⁰Pishibiche, sehe tuu akashim yok pork ye yotiis eyok Irhĩchpe. Uhu pehet kiis pork eyok yahmũr Cristo. ²¹Tichew ana hutita tokosim owa pork tikiraha erze uje tapur owa ich ahakõr hn uhu iyuwe uje tapur owa. ²²Uje akashim Onésimo uhu itsorz ich sehe tuu enshii owich yet toy par yok. Tikiraha uje shish olak orar apurlo Porrosht par yok, heke kimiji Porrosht nahmũr ich takaha tekirihĩ olak toy.

Porrosht aabo oshim Filemón saludo.

²³Epafras ishim owa saludo. Wichi pihyẽrak uje de karsel eheth shi pork ye oyotiis Jesucristope. ²⁴Marcos ishim owa saludo toy hn Aristarco hn Demas. Lucas ishim owa toy. Wir uje otakashim yok pibiyo. ²⁵Sehe tuu eyok Irhĩch Jesucristo dosir olak.